



Број/Број: 03/1-50-1-7-40/09
Сарајево/Сарајево, 6.7.2009. године

Z A P I S N I K

40. sjednice Zajedničke komisije za odbranu i sigurnost BiH Parlamentarne skupštine BiH, održane 6. 7. 2009., u vremenu od 10 do 11,45 sati

Sjednici su prisustvovali sljedeći članovi Zajedničke komisije: Branko Zrno, Šefik Džaferović, Slobodan Šaraba, Vinko Zorić, Jozo Križanović, Ivo Miro Jović, Drago Kalabić, Hazim Rančić i Adem Huskić.

Sjednici opravdano nisu prisustvovali: Mirko Okolić, Dušanka Majkić i Sulejman Tihiić.

Sjednici su prisustvovali i gosti, predstavnici medija, kao i predstavnici Sekretarijata Parlamentarne skupštine BiH:

- Miladin Miložčić, Zajednički štab OSBiH,
- Muhamed Smajić, Ministarstvo odbrane BiH,
- Radenko Stanić i Nermina Kadić, Ministarstvo sigurnosti BiH,
- Asim Fazlić i Tanja Popović, Interpol,
- Jovo Đurica i Mustafa Ovčina, Granična policija BiH,
- Smajil Muhić, SIPA,
- Christian Haupt, USAID PSP u BiH,
- Jasna Dragičević i Šejla Bektašević, Misija OSCE-a u BiH,
- Amel Fako, Ambasada SAD-a u BiH,
- Jasmin Ramović, EUPM,
- Sanita Rožajac, Dnevni avaz,
- Aida Kovač, FENA,
- Igor Petković, savjetnik zamjenice predsjedavajućeg Doma naroda PSBiH,
- Zoran Brkić, Sektor za odnose s javnošću PSBiH,
- Dragica Hinić, sekretar Zajedničke komisije za odbranu i sigurnost BiH, Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno** koji je članove Zajedničke komisije upoznao s predloženim dnevnim redom.. Predložio je da se dnevni red u tački 4. dopuni Informacijom o izvođenju priprema za vježbu „Združeni napor“, navodeći da su članovi ovaj materijal dobili ranije.

Članovi Zajedničke komisije prihvatili su prijedlog Branka Zrne.

Kako nije bilo daljnje rasprave o prijedlogu dnevnog reda, konstatirano je da 40. sjednica Zajedničke komisije za odbranu i sigurnost BiH ima sljedeći

DNEVNI RED

1. Usvajanje Zapisnika 39. sjednice Zajedničke komisije;

2. Izvještaj o učešću pripadnika Oružanih snaga, policijskih i državnih službenika BiH u operacijama podrške miru u periodu od 1.7. do 31.12.2008. (predlagači: Predsjedništvo BiH i Vijeće ministara BiH);
3. Razmatranje:
 - a. Informacije o realizaciji NATO Trust fonda za BiH i aktivnostima Ministarstva odbrane BiH u oblasti tranzicije i zbrinjavanja personala,
 - b. Programa tranzicije i zbrinjavanja otpuštenog personala MOBiH i OSBiH „Perspektiva“(sačinilac: Ministarstvo obrane BiH);
4. Razmatranje:
 - a. Informacije o aktivnostima na izradi dokumenta „Pregled odbrane“ (sačinilac: Ministarstvo odbrane BiH);
 - b. Informacije o izvođenju priprema za vježbu “Združeni napor 2009.”
5. Utvrđivanje Prijedloga autentičnog tumačenja člana 102. Zakona o policijskim službenicima BiH;
6. Prijedlog rješavanja pitanja upravljanja graničnim prijelazima (predlagač: Granična policija BiH)
7. Informacija NCB Interpol za BiH o potjernicama NCB Interpola Beograd raspisanim protiv određenog broja bh. građana u slučaju tzv.Dobrovoljačka ulica (sačinilac: NCB Interpol Sarajevo);
8. Tekuća pitanja:
 - a) Informacija o održanoj radionici o SALW, Međugorje, od 13. do 15. 5.2009.;
 - b) Informacija o održanom sastanku s delegacijom Ministarstva vanjskih poslova Kraljevine Švedske, 27.5.2009.
 - c) Informacija o obavljenoj posjeti Komandi obuke i doktrine OSBiH, razgovoru s generalskim korom OSBiH i posjeti 6. pješadijskoj brigadi OSBiH, Travnik i Banja Luka, 2. i 3. juna 2009.;
 - d) Informacija o održanom sastanku predstavnika Zajedničke komisije za odbranu i sigurnost BiH s predstavnicima Odbora za sigurnost NSRS-a, Banja Luka, 3.6.2009.;
 - e) Izvještaj o učešću na ceremoniji na vojničkom groblju Lebring, Gratz (R Austrija), 5.6.2009.;
 - f) Prijedlozi Fondacije za istraživanje Državnog univerziteta Njujork-Centar za međunarodni razvoj, Projekat jačanja paralamenata u BiH za saradnju sa Zajedničkom komisijom za odbranu i sigurnost BiH.

Ad. 1. Usvajanje Zapisnika 39. sjednice Zajedničke komisije

Članovi Zajedničke komisije su jednoglasno, sa sedam glasova „za“, usvojili Zapisnik 39. sjednice.

Ad. 2. Izvještaj o učešću pripadnika Oružanih snaga, policijskih i državnih službenika BiH u operacijama podrške miru u periodu od 1.7. do 31.12.2008. (predlagači: Predsjedništvo BiH i Vijeće ministara BiH)

Branko Zrno, otvarajući raspravu o ovom izvještaju, ocijenio je korektno urađenim njegov dio koji je vezan za učešće OSBiH, ali je naveo da postoje određene nelogičnosti kada je u pitanju učešće policijskih službenika. One se odnose na broj učesnika i zaključio je da se po ranije prihvaćenom Izvještaju zna koliko tačno ljudi učestvuje u ovim misijama. Taj broj ljudi može biti manji, ali nikako veći, kako je to predloženo u konkretnom slučaju. U tom smislu je naveo da bi Komisija trebalo da dobije jednu dodatnu informaciju o učešću pripadnika OSBiH u operacijama podrške miru, koja bi razjasnila ovu i sve druge nejasnoće koje iz nje proizilaze.

Slobodan Šaraba naveo je da Izvještaj koji se razmatra na ovoj sjednici Komisije nije aktuelan, s obzirom da je dostavljen Komisiji s velikim zakašnjenjem. Stoga je zamolio da ovi izvještaji u budućnosti budu aktuelniji. Dalje, s obzirom da učešće pripadnika OSBiH, policijskih i državnih službenika, obrađeno ovim Izvještajem, košta BiH oko 12 miliona KM svake godine, naveo je da bi bilo dobro prikazati raspodjelu tih finansijskih sredstava kao i analizu šta BiH dobiva ulaganjima u ove misije.

Adem Huskić saglasio se sa stavom da materijal treba biti ažurniji, ali je naveo da on ima razumijevanja za ovakvo kašnjenje, s obzirom da u njegovoj izradi učestvuju Ministarstvo odbrane BiH, Ministarstvo sigurnosti BiH i Ministarstvo vanjskih poslova BiH, nakon čega on ide na usvajanje Vijeću ministara BiH i Predsjedništvu BiH, a koje ga dalje poslužuje Parlamentarnoj skupštini BiH na usvajanje. Naveo je da je misija pripadnika OSBiH, policijskih i državnih službenika BiH u Iraku uspješno okončana, te zaključio da zato PSBiH treba dati pozitivnu ocjenu o ovoj misiji. Razlozi za ovo leže prvobitno u činjenici što nije bilo žrtava iz BiH za vrijeme trajanja ove misije, kao i da misiju nisu obilježile nikakve velike afere. Ocijenio je da su svi pripadnici adekvatno predstavljali državu BiH i da im za to treba odati dužno priznanje. Ovakvi pozitivni učinci dovode do zaključka da BiH i ubuduće treba učestvovati u ovakvim misijama, te zaključio da zato nije potrebno dovoditi u pitanje buduće mirovne misije pripadnika BiH u inozemstvu.

Jozo Križanović zaključio je da je Izvještaj sačinjen uglavnom informativno i da daje odgovore na pitanja angažmana pripadnika OSBiH, policijskih i državnih službenika u operacijama podrške miru, te da bi ga kao takvog mogao podržati. Kao vrlo važnu naveo je činjenicu da PSBiH na vrijeme treba odobravati slanje ovih pripadnika u mirovne misije i s tim u vezi se treba znati da li je PSBiH na vrijeme donosila odluke o slanju ovih pripadnika u mirovne misije navedene na posljednjoj stranici Izvještaja.

Ivo Miro Jović ocijenio je Izvještaj nepreglednim, te predložio da budući izvještaji imaju pregled po misijama, sa svim pratećim analitičkim podacima. Stoga je sugerirao da sve što je navedeno za misije u ovom izvještaju bude prikazano samo na drugačiji metodološki način.

Branko Zrno se, sumirajući raspravu, najprije osvrnuo na diskusiju Slobodana Šarabe, navodeći da je Komisija prilikom razmatranja posljednjeg ovakvog izvještaja donijela i zaključak da on treba biti dostavljen Komisiji u roku od 60 dana od isteka izvještajnog roka. Također je podržao njegovu diskusiju koja je išla u smjeru da ovaj izvještaj treba sadržavati analitičku finansijsku strukturu misije. U vezi s prijedlogom Ive Mire Jovića, zaključio je da je dobro predložiti novu metodologiju, ako će ona olakšati preglednost ovog izvještaja.

Zatim je pozvao članove Komisije da se izjasne o Izvještaju.

Zajednička komisija je potom jednoglasno, s devet glasova „za“, usvojila Izvještaj o učešću pripadnika Oružanih snaga, policijskih i državnih službenika BiH u operacijama podrške miru za period od 1.7. do 31.12.2008., sa zaključkom kojim se njegov dio broj 10. Zaključci-Odobranje produžetka učešća pripadnika tokom 2009. treba uskladiti s već ranije, u prethodno usvojenom Izvještaju, odobrenim nivoom učešća policijskih službenika u mirovnim misijama UN-a u Liberiji (UMIL), u Sudanu (UNMIS) i Kipru (UNFICYP).

Ad. 3. Razmatranje:

- a. Informacije o realizaciji NATO Trust fonda za BiH i aktivnostima Ministarstva odbrane u oblasti tranzicije i zbrinjavanja personala,**
- b. Programa tranzicije i zbrinjavanja otpuštenog personala MOBiH i OSBiH „Perspektiva“ (sačinilac: Ministarstvo obrane BiH)**

Branko Zrno je u uvodnim napomenama naveo da se kod ove tačke dnevnog reda radi o razmatranju dva nivoa istog problema. Istakao je da je od izuzetne važnosti što su Ministarstvo odbrane BiH i OSBiH ovaj proces pokrenuli prije početka realizacije Programa „Perspektiva“, s obzirom da su u tom periodu mogući i socijalni potresi zbog otpuštanja oko tri hiljade lica iz aktivne vojne službe naredne godine zbog njihove životne dobi. Još je naveo da je ova tema svojom specifičnošću zainteresirala cjelokupnu bosanskohercegovačku javnost.

Jozo Križanović konstatirao je da je NATO Trust fond pri kraju, te je zaključio da bi stoga bilo dobro da se prikaže kakvi su rezultati ostvareni putem ovog fonda. U svojoj diskusiji izrazio je čuđenje činjenicom da je putem aktivnosti Trust Fonda bilo moguće osigurati 8 miliona eura, a u Informaciji je prikazano da je utrošeno 5,8 miliona eura, te kao razlog navedeno da je smanjen broj prekobrojnog osoblja sa šest na tri hiljade lica, u čemu su značajan doprinos dale Vlada FBiH i Vlada RS-a, preuzimanjem dijela personala i penzioniranjem određenog broja lica pod povoljnim uslovima. S tim u vezi pitao je predstavnike Ministarstva odbrane BiH zašto nije iskorišteno ovih 8 miliona eura, ako su bili na raspolaganju.

Muhamed Smajić, predstavnik Ministarstva odbrane BiH, naveo je da se u Informaciji o realizaciji NATO Trust fonda za BiH i aktivnostima Ministarstva odbrane BiH u oblasti tranzicije i zbrinjavanja personala, mogu vidjeti ukupni efekti i način na koji se realizirao NATO Trust fond. Odgovarajući na pitanje Križanovića, naveo je da se ukupna sredstva nisu mogla u potpunosti iskoristiti, jer su ona bila limitirana ukupnim brojem prekobrojnih lica. Taj broj je, dakle, bio limitiran brojem prekobrojnog personala, kao i odzivom zemalja koje su bile spremne uplatiti novčana sredstva u ovakav fond.

Miladin Miložić, načelnik Zajedničkog štaba OSBiH, odgovarajući također na pitanje Križanovića, naveo je da se ovdje konkretno radilo o projektu koji je uspostavljen s rokom od tri godine, te da proces odabira personala, nažalost, nije išao u željenom smjeru. Vlade entiteta donijele su zakone o povoljnosti penzioniranja, kojima su apsorbirale jedan dio personala koji su u skladu s tim zakonima stekli uslove za penzioniranje. Drugo pitanje, koje je primarno, jeste otpust 2750 ljudi početkom sljedeće godine. Naveo je da je on prvi dao tu informaciju u medije, nakon čega je bio kritiziran. Još je naveo da su OSBiH ovakav potez mogle napraviti i 2007. godine, ne produžavajući ugovore s vojnicima, ali je ocijenio da je dobro što je ljudstvo tada zadržano, s obzirom da je upravo od ovog broja ljudi u ovom periodu osigurano čuvanje viška lokacija i skladišta. Nadalje je naveo da će se OSBiH suočiti u periodu od 1.3. do 30.6.2010. s manjkom vojnika koji se otpuštaju, te će procenat popune biti 58%. Naglasio je potom da se postavljaju osnovna pitanja, kao što su pitanja kako pomoći ovim ljudima, te na koji način i u kojem procentu izvršiti popunu strukture OSBiH s novim vojnicima. Zamolio je Komisiju za podršku u zajedničkim rješavanju ovih problema. Još je naveo podatak da je trenutna popunjenost ljudstvom OSBiH 98,5 %, te zaključio da se treba odrediti da li će se ići na održavanje ovog procenta popune i u budućnosti ili će na račun ovog otpusta smanjiti nivo popune na nivou bataljona i brigada, čime bi ovaj procenat bio niži.

Branko Zrno konstatirao je da je rasprava o ovom problemu na vrijeme otvorena, te naveo da podrška Komisije OSBiH ne smije doći u pitanje.

Slobodan Šaraba pitao je za mogućnost da se utvrđeni rok 1.3.2010. produži, te ako postoji ta mogućnost, kakva bi onda bila procedura za to i šta bi se time dobilo. Pojasnio je da ovo pitanje postavlja jer se i BiH nalazi u recesiji. Zaključio je da je dokument Programa tranzicije i zbrinjavanja otpuštenog personala MOBiH i OSBiH „Perspektiva“ dobro sačinjen, ali je naglasio da je urađen u trenutku kada nije bilo ekonomske krize, te izrazio sumnju da on neće dati iste rezultate kakve bi dao da nema recesije.

Hazim Rančić pitao je za razloge koji sprečavaju redovan proces zamjene kadra u OSBiH, odnosno šta je alternativa ovom procesu.

Vinko Zorić predložio je da se prijedlog 4. zaključka, koji je Ministarstvo odbrane BiH predložilo PSBiH u okviru Informacije o realizaciji NATO Trust fonda za BiH i aktivnostima Ministarstva odbrane BiH u oblasti tranzicije i zbrinjavanja personala, u potpunosti briše, te da se predloženi 5. i 6. zaključak spoje u jedan zaključak, i da se ne traži od Vijeća ministara BiH da osigura, već da pokuša osigurati podršku entitetskih i svih drugih nivoa vlasti, kao i međunarodne zajednice.

Ivo Miro Jović pozdravio je izradu ovakvog materijala i odao priznanje predlagачu što je pohvalio penzione fondove. Naveo je da ga vesele principi izneseni u Informaciji: jedinstvo napora svih struktura, zakonitost u poštivanju propisa i kriterija, ravnopravnost, princip rangiranja, itd. Naveo je da je u posljednjih nekoliko mjeseci preko 300 ljudi imalo mogućnost da ostvari jedno od svojih prava po osnovu otpusta iz vojne službe, ali je Vlada FBiH donosila uredbе umjesto zakona, a opće je poznato da je uredbе moguće donositi samo u vrijeme ratnog stanja. Takvim odnosom su neki ljudi prihvatili neka, za njih izuzetno nepovoljna rješenja, tražeći danas svoja prava i tužeći FBiH. Stoga je zamolio da se svi aspekti do kraja sagledaju kako u budućnosti ne bi ponovno upali u iste probleme. Bilo bi dobro dobiti kvalitetne programe na ovdje predloženim principima. Zaključio je da bi ovi ljudi mogli biti prepoznati i kao kvalitetni kadrovi u sigurnosnom segmentu, prije svega u Graničnoj policiji, borbi protiv narkomanije i organiziranog kriminala i sl. Uz malo osposobljavanje, oni bi se mogli iskoristiti u popunjavanju sigurnosnog sektora.

Šefik Džaferović zaključio je da su osnovni razlozi otpusta 2750 lica iz OSBiH godine starosti i nastavak reforme odbrane u BiH. Konstatirao je da je BiH kasnila s procesom tranzicije OSBiH, ne preduzimajući potrebne mjere, te naveo da stoga niko ne bi trebalo zbog tog kašnjenja da snosi posljedice. On nije za to da država odjednom ostane bez 58 % vojnika, već da popunjenost OSBiH bude 100 %, kako bi one mogle obavljati svoju misiju. Problem je ocijenio ozbiljnim i dodao da zavređuje raspravu oba doma PSBiH. Također je rekao da o ovom pitanju treba obaviti razgovore i sa Štabom NATO-a u BiH, s obzirom da se OSBiH ustrojavaju prema standardima NATO-a. I on je naveo da je potrebno naći modalitete kojima će se pomoći ljudima koji budu otpušteni naredne godine. Zato je predložio da se ove informacije prime k znanju, a kompletan materijal uputi na raspravu domovima PSBiH, kako bi oni tokom jula još jednom raspravljali o ovim problemima. Od Zajedničkog štaba OSBiH i Ministarstva odbrane BiH zatražio je dopunu informacije po do sada postavljenim pitanjima, a naročito koliki je broj planiranog otpusta vojnika u odnosu na starost i u odnosu na zahtjev reforme.

Branko Zrno saglasio se s diskusijom Šefika Džaferovića i zaključio da bi Komisija trebalo da zatraži dopunjenu informaciju, raspravlja o njoj i tek nakon te rasprave prosljedi je domovima na daljnju raspravu.

Jozo Križanović ocijenio je da je BiH već ušla u doba sveopće krize. Naveo da se u Programu tranzicije „Perspektiva“ pretpostavlja da se očekuje puni angažman PSBiH kako bi se za narednu godinu našla sredstva, kao i da će se praviti sporazumi i s entitetima kako bi se i iz njihovih budžeta osigurala određena novčana sredstva. On je ocijenio da će sve ovo biti problem s obzirom da će BiH naredne godine, nažalost, finansijski stajati još lošije nego ove. Naglasio je da je i on za to da se zbrinu lica koja će biti otpuštena iz vojne službe naredne godine, ali i da iz ovoga proizilazi i novo pitanje koje se odnosi na popunu personala. Nadalje, konstatirao je da danas 860 vojnika nije uključeno u proces obuke, već rade kao stražari na čuvanju neperspektivne nepokretne i pokretne vojne imovine, te prema tome postavio je pitanje da li se određena finansijska sredstva za pokrivanje jednog dijela troškova otpuštenog prekobrojnog personala mogu tražiti u prihodima koje bi OSBiH ostvarile ukoliko se naredne godine riješi ovo pitanje. Zaključio je da bi bilo dobro da neko kaže da neće biti problem za BiH ako popunjenost OSBiH bude oko 80%.

Drago Kalabić nije se saglasio s mišljenjem Šefika Džaferovića da o ove informacije treba da razmatraju domovi PSBiH, navodeći da se, s obzirom na poznati način rada domova, neće time načiniti nikakav napredak. Složio se, pak, da se cjelokupan sistem treba posmatrati u okviru postojeće krize, te naveo da OSBiH ne mogu biti izdvojeni segment tog sistema. Ocijenio je da je očito da BiH trenutno taj novac nema i da će biti izuzetno teško izdvojiti ta sredstva za OSBiH. Također je potvrdio da nema potrebe za apsolutnom popunjenošću OSBiH ukoliko za to ne postoje finansijski uslovi. Ovu reformu prvenstveno BiH treba raditi u koordinaciji sa NATO-om i od njega tražiti razumijevanje za ovakav put BiH u tom smislu, s obzirom na specifičnost BiH kao države. Zaključio je da se u budućim razgovorima o ustavnim reformama u BiH može sasvim sigurno očekivati rasprava i o ovim pitanjima.

Šefik Džaferović je, odgovorajući na diskusiju Drage Kalabića, naveo da ovdje nije pitanje budžetske stavke, već hoće li umjesto ovih 2750 lica doći novih 2750, ili će se praviti određena pomijeranja.

Branko Zrno ocijenio je da je Komisija raspravom ušla u sistemski ozbiljnu raspravu, ne govoreći samo o socijalnoj osjetljivosti ovog pitanja, te je stoga podržao stavove iznesene u diskusiji Drage Kalabića da se ova informacija ne šalje domovima PSBiH na raspravu, već da njen dostavljač Komisiji treba dostaviti dodatne odgovore po njoj s elementima koji nisu bili uključeni u prvobitnu informaciju.

Ivo Miro Jović naveo je da je Informacija dobra polazna osnova za dogradnju jednog projekta kao što je „Perspektiva“. Konstatirao je da u njoj nedostaju iskustva zemalja koje su nedavno pristupile NATO-u, kao i iskustvo starijih zemalja članica, po pitanju rješavanja ovog problema. Stoga je predložio da Zajednička komisija početkom septembra zakaže javnu raspravu, na kojoj bi se razmatrali faktori navedeni u ovoj informaciji, kao i iskustva zemalja članica NATO-a o ovim pitanjima.

Adem Huskić izrazio je bojazan da će se Komisija usvajanjem zaključaka o primjeni ovakvog programa dovesti u situaciju da ovim licima da lažnu nadu. Ocijenio je dobrom činjenicu da je general Milošević blagovremeno javnosti prezentirao ovaj problem, ističući da bi se u suprotnom ova struktura zasigurno suočila sa šokom, te naveo da stoga ne treba praviti dodatne probleme s produžavanjem ugovora. Vojska u BiH je stara i ovim programom je predviđeno da stare vojnike zamjenjuju mlađi. Stoga je predložio da Komisija podrži Ministarstvo odbrane BiH u provođenju ovog procesa, ne produžavajući dodatno rokove po ovom pitanju. Sugerirao je Ministarstvu odbrane BiH da omogući određenu edukaciju ljudima koji će provođenjem ovog programa biti otpušteni, kako bi oni bili što spremniji za život u civilu.

Hazim Rančić ocijenio je da Komisija može primiti k znanju Informaciju o realizaciji NATO Trust fonda za BiH i aktivnostima Ministarstva odbrane BiH u oblasti tranzicije i zbrinjavanja personala, sa zaključkom da od Ministarstva odbrane BiH zatraži da po okončanju realizacije ovih sredstava od 5.833.000 eura dostavi konačnu informaciju o njihovom utrošku. Kada je u pitanju Informacija vezana za otpust personala, zamolila je da ona sadrži i podatke o budućoj popunjenosti strukture oficirima i podoficirima, kao i civilnim licima u odnosu na sadašnje stanje.

Miladin Milošević odgovorio je na određena pitanja koja su mu upućena tokom rasprave o ovim informacijama. Naveo je da je jedini put daljnjeg prolongiranja predviđenog roka izmjena postojećeg zakona. Upozorio je da se svakim daljnjim pomjerenjem rokova u OSBiH šalje neozbiljna poruka ka NATO-u po pitanju pristupa MAP-u. Složio se s diskusijom nekih članova Komisije da je ovaj materijal, koji je ocijenio polaznom osnovom, potrebno nadograditi i naveo da će OSBiH izvršiti njegovu nadopunu. Odgovarajući na pitanje na koji način izvršiti popunu, odgovorio je da je kapacitet Centra za obuku OSBiH u Pazariću, koja traje tri mjeseca, 300 lica, te prema tome prognozirao da će u periodu od 15 mjeseci, do kraja 2010., OSBiH tim tempom obučiti 1500 lica. Nadalje je naveo da su OSBiH raspisale interne oglase za 671 lice na poziciju civilnih lica u OSBiH, kojim bi se mogao riješiti problem jednog dijela od ovih 2750 lica, uz uslov da za ta lica njihov neposredni rukovodilac da dobre preporuke. Kao drugi način rješavanja ovog problema naveo je i mogućnost da se određeni broj prevede u kategoriju oficira ili podoficira, ali je istakao da se ovdje radi o izuzetno limitiranom broju radnih mjesta. Zaključio je da OSBiH vodi računa o svakoj poziciji i o svakom pojedincu. Nadalje je u napomenuo da su OSBiH zaposjele 54 neperspektivne lokacije, od kojih na njih 20 postoji samo straža, a čiji režijski troškovi iznose od 3.000.000 do 5.000.000 KM godišnje. Kada bi se ove lokacije predale vlastima entiteta, onda bi se ozbiljno moglo govoriti o nivou popune OSBiH i misijama koje bi BiH trebalo da preuzme.

Branko Zrno zahvalio se generalu Miloševiću i pozvao potom članove Komisije da se izjasne o Informaciji.

Zajednička komisija za odbranu i sigurnost BiH primila je k znanju Informaciju o realizaciji NATO Trust fonda za BiH i aktivnostima Ministarstva odbrane BiH u oblasti tranzicije i zbrinjavanja personala, kao i Informaciju o Programu tranzicije i zbrinjavanja otpuštenog personala MOBiH i OSBiH „Perspektiva“, sa zaključkom da se od Ministarstva odbrane BiH i OSBiH zatraži da u što kraćem roku dostave novu kompletnu Informaciju o aktivnostima u oblasti tranzicije i zbrinjavanja otpuštenog personala, koja će biti predmet nove rasprave Komisije.

Ad. 4. Razmatranje:

- a. Informacije o aktivnostima na izradi dokumenta „Pregled odbrane“ (sačinilac: Ministarstvo odbrane BiH);**
- b. Informacije o izvođenju priprema za vježbu “Združeni napor 2009.”**

Slobodan Šaraba je Informaciju o aktivnostima na izradi dokumenta „Pregled odbrane“ ocijenio vrlo korektnom, te zaključio da u jednom njenom dijelu Ministarstvo odbrane BiH poziva Zajedničku komisiju da zajedno s ovim ministarstvom učestvuje u izradi ovog dokumenta. Predstavnicima Ministarstva odbrane BiH postavio je pitanje da li to znači da će u jednoj fazi izrade ovog dokumenta Komisija dobiti dokument u formi radnog materijala kako bi na njega davala određene primjedbe, te potom ići u određenu daljnju raspravu, ili to, pak, znači neki drugi vid saradnje.

Muhamed Smajić naveo je da se ovdje pretpostavlja upravo ovakav vid saradnje koji je naveo Šaraba u svojoj diskusiji.

Kako nije bilo daljnje rasprave o ovoj tački dnevnog reda, Zajednička komisija za odbranu i sigurnost BiH primila je k znanju Informaciju o aktivnostima na izradi dokumenta „Pregled odbrane“, kao i Informaciju o izvođenju priprema za vježbu “Združeni napor 2009.”

Ad. 5. Utvrđivanje Prijedloga autentičnog tumačenja člana 102. Zakona o policijskim službenicima BiH

Slobodan Šaraba naveo je da on ne prihvata mišljenje koje su o ovom prijedlogu dali PIORS-a i PIO/MIO FBiH, zaključujući da se tu radi o restriktivnom tumačenju Zakona, a da je njegovo mišljenje da Zakon treba tumačiti šire. Potpisivanjem ugovora o radu, lice koje je taj ugovor potpisalo stiče sva prava predviđena Zakonom, bez obzira da li se u određenom momentu nalazilo na godišnjem odmoru ili ne. Stoga je zaključio da on ne želi tumačiti Zakon na štetu ljudi.

Šefik Džaferović naveo je da je Komisija prilikom posljednjeg razmatranja ovog prijedloga autentičnog tumačenja tražila, između ostalog, i informaciju o tome kako je ova problematika rješavana u posljednjih 20 godina, a na što nije dobila odgovor. Zaključio je da Komisija treba insistirati na tom pitanju, te nakon dobivanja odgovora na njega treba razmotriti i mogućnost eventualne izmjene samog Zakona. Stoga je predložio da Zajednička komisija odgodi daljnju raspravu o ovoj tački, te da do sljedeće sjednice od Vijeća ministara BiH i Ministarstva sigurnosti BiH ponovo zatraži odgovor na pitanje kakva je bila prethodna praksa u prizavanju beneficiranog radnog staža policijskim službenicima, kao i pregled rješenja ovog pitanja u praksama susjednih zemalja.

Zajednička komisija potom je jednoglasno prihvatila prijedlog Šefika Džaferovića.

Ad. 6. Prijedlog rješavanja pitanja upravljanja graničnim prijelazima (predlagač: Granična policija BiH)

Slobodan Šaraba istakao je da su Granična policija BiH i Ministarstvo sigurnosti BiH u dopisima predložili dvije varijante rješavanja ovog problema, i to da se osnuje posebna Agencija za

upravljanje graničnim prijelazima ili da se izvrše izmjene i dopune postojećeg Zakona o UIO kojima bi u ovoj instituciji bilo formirano zasebno odjeljenje koje bi radilo ove poslove. Kako Komisija na ovoj sjednici, na zahtjev Ministarstva sigurnosti BiH, treba da se izjasni koja je od ove dvije opcije prihvatljivija, naveo je da je njegovo mišljenje da je, zbog prirode problematike, operativniji prvi prijedlog rješenja, odnosno formiranje nove agencije.

Jozo Križanović naveo je da je ključni problem koji postoji čitav niz godina, zbog kojeg je i granica neuređena, nepostojanje institucije zadužene za rješavanje najosnovnijih stvari na graničnim prijelazima. Zabrinjavajuća je činjenica da Komisija za upravljanje granicama radi na ovom problemu već godinu dana, a Vijeće ministara BH se o tome ne izjašnjava. Dakle, bitno je da se što prije dođe do uređenog rješenja, bez obzira na to kojom od ponuđenih varijanti će se do njega doći.

Ad. 7. Informacija NCB Interpol za BiH o potjernicama NCB Interpola Beograd raspisanim protiv određenog broja BH građana u slučaju tzv. Dobrovoljačka ulica (sačinilac: NCB Interpol Sarajevo)

Asim Fazlić, predstavnik Interpola, upoznao je članove Komisije da je Interpol Zajedničkoj komisiji, osim informacije od 16. 6. 2009., koju su članovi Komisije dobili u materijalima za ovu sjednicu, sačinio još jednu, dopunjenu informaciju, koju je, 2. 7. 2009., uputio Parlamentarnoj skupštini BiH.

Članovi Zajedničke komisije, kao i sekretarijata Komisije, konstatirali su da još nisu dobili navedenu informaciju, čime je daljnja rasprava o ovoj tački dnevnog reda odgođena do dostavljanja nove dopunjene informacije.

Ad. 8. Tekuća pitanja:

a) Informacija o održanoj radionici o SALW, Međugorje, od 13. do 15. 5.2009.

Zajednička komisija primila je k znanju Informaciju o održanoj radionici o SALW, održanu u Međugorju, od 13. do 15. 5.2009., uz korekciju koja se odnosi na brisanje drugog dijela zaključka broj 2., te brisanje zaključka broj 5. u potpunosti.

b) Informacija o održanom sastanku s delegacijom Ministarstva vanjskih poslova Kraljevine Švedske, 27.5.2009.

Zajednička komisija primila je k znanju Informaciju o održanom sastanku s delegacijom Ministarstva vanjskih poslova Kraljevine Švedske.

c) Informacija o obavljenoj posjeti Komandi obuke i doktrine OSBiH, razgovoru s generalskim korom OSBiH i posjeti 6. pješadijskoj brigadi OSBiH, Travnik i Banja Luka, 2. i 3. juna 2009.

Zajednička komisija primila je k znanju Informaciju o obavljenoj posjeti Komandi obuke i doktrine OSBiH, razgovoru s generalskim korom OSBiH i posjeti 6. pješadijskoj brigadi OSBiH, Travnik i Banja Luka, 2. i 3. juna 2009.

d) Informacija o održanom sastanku predstavnika Zajedničke komisije za odbranu i sigurnost BiH s predstavnicima Odbora za sigurnost NSRS-a, Banja Luka, 3.6.2009.

Zajednička komisija primila je k znanju Informaciju o održanom sastanku predstavnika Zajedničke komisije za odbranu i sigurnost BiH s predstavnicima Odbora za sigurnost NSRS-a, Banja Luka, 3.6.2009.

e) Izvještaj o učešću na ceremoniji na vojničkom groblju Lebring, Gratz (R Austrija), 5.6.2009.

Zajednička komisija jednoglasno je, s devet glasova „za“, usvojila Izvještaj o učešću na ceremoniji na vojničkom groblju Lebring, Gratz, 5.6.2009., sa zaključkom da se u narednom periodu vodi računa o ravnopravnoj zastupljenosti predstavnika sva tri naroda na ovoj ceremoniji.

f) Prijedlozi Fondacije za istraživanje Državnog univerziteta Njujork-Centar za međunarodni razvoj, Projekat jačanja paralemenata u BiH za saradnju sa Zajedničkom komisijom za odbranu i sigurnost BiH.

Zajednička komisija jednoglasno je usvojila Prijedlog Fondacije za istraživanje Državnog univerziteta Njujork-Centar za međunarodni razvoj, Projekat jačanja paralemenata u BiH za saradnju sa Zajedničkom komisijom za odbranu i sigurnost BiH.

Zapisnik sačinila
Dragica Hinić

Predsjedavajući
Zajedničke komisije
Branko Zrno